

SOTA PILMIRON SOLAT NEN SAN JUAN

¹ Iyay i isolat ko para son si-kayo, ta piyan kon ikowan son si-kayo sota maypangkep son Cristo ja emengipa-amta ni maypangkep son Apo Shiyos, tan emengi-kan ni biyag. Si Cristo, sigod ja wára ngoreshan nonta eg pay laeng epalsowa iya dobong jet nonta indaw to did ja dobong, mismon intenengan miy inkowan to, inon-an miy dingka to, tan pinishat mi pay i bakdang to.

²⁻³ Si-katoy kawad-an ni biyag ja enshiy to engintegan jet sigod ja wára ngoreshan son Apo Shiyos ja Ameto. Jet si Apo Shiyos, inbetkag to di son si-kami, jet inon-an min mismo sotan na biyag ja wára son si-kato. Isonga niman, mesepol ngon sota inon-an mi tan intenengan mi, ikowan mi son si-kayo, say maykait kayo ngo son si-kami ni inpakikadwa mi son Apo Shiyos ja Ama, tan si Jesucristo ja Anak to.

⁴ Isolat mi iyay say ma-annay i imdeng tayon emin.

Si Apo Shiyos komay onoran tayo ni olay

⁵ Say ikowan mi son si-kayo, sota intenengan mi son Cristo, ja kowan to ey, “Si Apo Shiyos, poro mapteng i wára son si-kato jet enshin polos son si-kato i ngaaw. Isonga may-eshig ey si-katoy silew et enshin polos son si-kato i embolinget.”

⁶ Jet no kowan tayo ey kitoka mekikadwa son si-kato ey sota itsora ni biyag tayo mango ket

ngaaw, ono ngaaw i tayoka dagdag-a, o-owap sota kowan tayo ey tayoka pekikadwa son si-kato, ta eg nay-anam sota ngaaw wa aramid nodta podnon bilin to.

⁷ Nem no si Apo Shiyos komay onoran tayo ni olay, ja mapteng i tayoka pesing, kenshat ta wára ngoy mapteng nga pekikadwa tayo ni sakey tan sakey, jet sota shala ni Anak ton si Jesus ja imayos shi koros, sotan i kaon-omas so ni emin na basol tayo.

⁸ No kowan tayo ey enshiy basol tayo, naytopo sotan na nemnem, jet enshi son si-katejo i podno.

⁹ Nem no ipodno tayoy basol tayo, pekawanan shakitejo nen Apo Shiyos, jet omasen toy aramid tayon ngaaw et sa-datan to ni mapteng. Sajay i pesing to ta mepiyal ja mengaasi tan mapteng ni olay i toka dagdag-a, enshiy toka pankodangi.

¹⁰ Jet say kowan to, emin na too, sapasap pa nanbasol; isonga no kowan tayo ey enshiy aramid tayon ngaaw, singa si Apo Shiyos et ngo mowan i kowan tayo ey ma-o-owap, ta eg tayo ewaten sota kowan to ey emin na too, sapasap pa nanbasol.

2

¹ Si-kayon singa annak ko, sajay i isolat ko son si-kayo, say eg kayo mandeka ni ngaaw wa aramid. Nem no bilang ey waray manbesol ja kait jo, mebedin na may-odi sota toka pekikadwa mowan son Apo Shiyos, ta waray mengitakshel son si-katejo shi sango-an nen Ametayo ja si Apo Shiyos, ja si Jesucristo. Kabaalan ton dag-en iyay tep enshin polos son si-kato i basol.

² Si-katoy engikesho ni basol tayon emati son si-kato ni inkatey to shi koros jet aliwén si-katejo bengat, no diket angken sota basol ni emin na totood ja dobong.

Sota pesing nga mengamta no wára kito son Apo Shiyos

³ Niman, sajay i amta-an tayo so no podnon amta tayo si Apo Shiyos. No tayoka pati-a i bilin to, wára kito son si-kato.

⁴ No kaspangarigan ey wáray toon mengikowan ey amta to si Apo Shiyos, nem eg to kari pati-en sota bilin to, sotan na too, ma-o-owap; enshiy podno son si-kato.

⁵ Nem sota toon ememati ni bilin to, sajay ya too, si-katoy sigoradon enshiy kolang ni semek to son Apo Shiyos. Isonga say amta-an tayo so ey wára kito son si-kato, sajay.

⁶ No sipay toon kowan to ey wára son Apo Shiyos, wára komay mapteng nga ogadi to, ja inges tos Cristo.

⁷ Si-kayon kait ko ja ensemek ko, mesepol la pati-en tayon emin i bilin nen Apo Shiyos, jet say wa-wa-sha koma son si-kayo, sota penmek ni sakey tan sakey. Sajay ya naka pan-isolat, aliwén bado, no diket sigod iyay ja bilin; intenengan jo ngoreshan nonta pilmiro.

⁸ Jet siya, wára ngo son si-kayo i semek ja inges toy kawasha to son Cristo nontan da. Nem singa bado iyay ya bilin tep emanka-omas ma niman shiya dobong sota may-eshig ey embolinget. Jet emankaisa-dat ma sota podno ja edapo son Apo Shiyos, ja may-eshig ey niyal.

⁹ No sipay toon kowan to ey wáred niyal tep toka onoris Apo Shiyos, nem en-oges to kariy kait to, say kay-eshigan ni kasesaad nontan na too, wára karid embolinget ingkato niman.

¹⁰ Nem no sipay toon ensemek toy kait to, si-katoy may-eshig ey wáred niyal, jet enshiy to panshanagan ey waray kaysepti-an to.

¹¹ Nem sota toon en-oges toy kait to, may-eshig ey wáred embolinget, jet singa embolinget pay ya emin i toka pan-ak-akshi; isonga eg to amtay toshongen to. Ta singa kinoshab ni embolinget.

Mesepol ngon maysi-jan kito shiya maramen ngaaw wa aramid shiya dobong

¹² Mebedin na mansodatak son si-kayon naka ikarin annak ko, tep epakawanan i basol jo ni inpamatiyo ni ngaran nen Jesus.

¹³ Mebedin na mansodatak son si-kayon amma tep amtayos Jesus ja wára ngoreshan nonta eg pay laeng epalsowa iya dobong. Mebedin na mansodatak son si-kayon bedoleki tep inebak jo sota ngaaw i aramid to ja si Satanas.

¹⁴ Mebedin na mansodatak son si-kayon a-anak tep amtayos Apo Shiyos ja Ametayo. Mebedin pay ja mansodatak son si-kayon amma tep amtayos Jesus ja sigod ja wára ngoreshan nonta eg pay laeng epalsowa iya dobong. Mebedin na mansodatak son si-kayon bedoleki tep makedsang kayo. Ta say joka nemnema ni olay, sota esel nen Apo Shiyos; isonga inebak jos Satanas.

¹⁵ Saja kompormin ngaaw ja wára so ni karak-dan shiya dobong, aliwen sotan et ngo mowan

i jo piyanen. Ta no sipay toon sajay i wáred nemnem to, eg ngo mebedin na may-inshas ja sesmeken tos Apo Shiyos ja Ametayo.

¹⁶ Jet sajay ira sotan na ngaaw ja wára so ni karakdan shiya dobong: sota ngaaw wa itsoren pengamkam ni kompormi, sota ngaaw wa pangkep no wáray asen, sota pengitangsit ni kasesaad ni biyag. Sajay ira, aliwén si Ametayo ja si Apo Shiyos i edapo-an to, no diket sajay i ogadi ni karakdan shiya dobong ja eg emati son si-kato.

¹⁷ Isonga aliwén sotan i jo piyanen, ta saja marama niman, mepokaw ali jet ma-enshi mala sota kekamkamkami ni totoo niman. Nem sota toon ememati ni kowan nen Apo Shiyos ey dag-en to, si-katoy mebay-an ja wára ni olay ingkatod ingka.

Pantanshaan kayo, ta wára ma ira sota makakontra son Cristo

¹⁸ Si-kayon annak ko, entikey may timpo! Intenengan jo ey wára nin ali sota sakey ya sinan Cristo ja kontra to kariy obda nen Cristo, jet niman, eshaket ira ma shiya dobong. Isonga sajay i amta-an tayo so ey shanshani may tapos ni dobong.

¹⁹ Sajay iren too, istay ya singa nay-eshom ira son si-katejon emati son Cristo, nem enshi gayam. Isonga tinaynan shakito, ja eg sha ma intoloy ja mekikadwa son si-katejo. No agpayson naykait ira son si-katejo, ka-onong koma ira niman. Nem indekjas shakito, jet sajay i ka-amta-an ton pasiya ey emin ira, apil ira, aliwa karin kait tayod pamati.

²⁰ Nem si-kayo, amtayon mengilesin nonta podno, ta tinod-an shakejo nonta Ispirito Santo nen Apo Shiyos.

²¹ Say kabol la insolatan ko so niyay son si-kayo, aliwén gapota eg jo ewatan iya may-pangkep ni podnon kowan nen Apo Shiyos, no diket amtayo. Amtayo met ey enshiy o-owap pa mandepo nodta podnon kowan to.

²² Say owap pa toro ira nonta ira toon ma-owap, kowan sha ey si Jesus, aliwén si-kato kari sota inbetkag nen Apo Shiyos alid ja dobong. Sajay iren too ja eg memati son Apo Shiyos tan si Jesucristo ja Anak to, si-karay makakontra ni obda nen Cristo.

²³ Nem say nemnemen jo, sajay. No sipay too ja eg memati ey si Cristoy Anak nen Apo Shiyos, eg maybidang ey Ametos Apo Shiyos. Nem no sipay toon ememati ey si Jesus i Anak nen Apo Shiyos, si-katoy maka-ama so nen Apo Shiyos.

²⁴ Jet niman, say pesing jo say eg kayo ma-ewis son si-kara, sajay. Sota toron intenengan jo ngoreshan pangkep son Cristo, sotan komay nemnemen jo; karejo sa-datan. No sajay i pesing jo, wara kayo ni olay son Apo Shiyos, tan si Jesus ja Anak to.

²⁵ Jet say inkari nen Cristo son si-katejon on-onong ja memati son si-kato, biyag ga enshiy to engintegan.

²⁶ Nem mesepol la mantanshaan kayo, ta wara iray apil i toro sha ja piyan shakejon i-owapan. Isonga insolat ko iyay ya banshaan son si-kayo.

²⁷ Wara pay laeng son si-kayo sota Ispirito Santo nen Apo Shiyos ja in-akan nen Cristo, jet

si-katoy emengitosho son si-kayo ni emin na podno ja enshiy o-owap to. Isonga angken eg jo itolok ja itod-an shakejo nonta ira aliwen kait jod pamati. Sota intoro ngoreshan nonta Ispirito Santo nen Apo Shiyos son si-kayo, si-katoy nem-nemnemen jo; karekayo mebegnad nodta apil la toro.

Annak shakito nen Apo Shiyos; isonga mesepol la may-enam i ogadi tayo

²⁸ Niman si-kayon naka ikarin annak ko, mese-pol la si Cristoy pengipilmi-an jo so ni nemnem jo, say no onsabi ali sota timpo ja imotok to, eg kito mebebaingan ja singa onkesen shi sango-an to.

²⁹ Amtayo met ey si Apo Shiyos, poro mapteng i toka dagdag-a. Isonga niman, say koskoston pengimatonan jo nonta ira annak nen Apo Shiyos, si-kara sota kaon-onod ni mapteng ja kowan nen Apo Shiyos.

3

¹ Iyay i nemnemen jo koma. Say semek nen Apo Shiyos son si-katejon annak to, ebadeg ga pasiya, isonga mayngadnan kito ey annak to. Aliwen awag bengat, no diket podnon naykari kito ey annak to. Sota toon eg memati son si-kato, eg sha ewatan i kasesaad tayo ta angken si Apo Shiyos, eg sha pati-en.

² Si-kayon kait kod pamati ja ensemek ko, amta tayo ey annak shakito nen Apo Shiyos, nem niman, eg to pay inpa-amta son si-katejo no ngantoy panbedinan tayo di. Nem amta tayo

ey no onmotok alis Cristo, asen tayon mismo, jet ingesen tayo may itsora to.

³ Jet emin na toon sajay i namnama sha, ja emansessesked son Jesucristo, mesepol la enshi komay sha panbesolan, ta si Jesus, enshi ngoy toka panbesoli.

⁴ No sipay toon ngaaw i aramid to, si-katoy eg memati ni bilin nen Apo Shiyos, ta emin na ngaaw wa aramid, maykontra nodta bilin to.

⁵ Amtayo met ey say kabol la dinawan ali nen Cristo, to omasen iray ngaaw wa aramid tayo, ono basol tayo. Jet amtayo pay jey si-kato, enshiy basol to.

⁶ Isonga no sipay toon emati ja si Cristoy engipilmi-an to ni pamati to, ibi-jag toy ngaaw wa aramid to. Nem sota toon ngaaw ni olay i aramid to, si-katoy ka-amta-an to ey eg to am-amta tan eg memati son Cristo.

⁷ Jet no kowan to ey angken mandeka ni ngaaw, ta naykari met laeng da so nen Apo Shiyos, karejo i-onod, si-kayon naka ikarin anak ko. Ta say kekosto-i nen Apo Shiyos, sota inges tos Cristo ja emandeka ni olay ni mapteng.

⁸ Sota ira ngaaw ni olay i aramid to, wara ira son Satanas, ta angken nonta pilmiron timpo ngoreshan, si Satanas, ngaaw ni olay i aramid to. Jet say kabol la dinawan ali nen Cristo ja Anak nen Apo Shiyos, say ngawngawen ton emin sota kepengewis nen Satanas son si-katejo ja mandeka ni ngaaw. Isonga tanshaaniyo, ta no may-a-shom kayo nodta ngaaw wa aramid nen Satanas, maykontra kayo son Cristo.

⁹ No sipay toon si Apo Shiyos i Ameto, eg

ma mandeka ni ngaaw, ta nan-inges i ogadi-ren san-ama, jet eg ma mebedin na itoloy ton manbesol ni olay, tep anak ma nen Apo Shiyos.

¹⁰ Isonga sajay den inkowan ko la, sajay i pengamta-an ni toon anak nen Apo Shiyos tan toon wára ngo so nen Satanas. Sota toon ngaaw i toka dagdag-a, ono enshiy semek to ni kait to, aliwén si Apo Shiyos i kawad-an to.

Mesepol i semek so ni kait

¹¹ Angken nonta pilmiron emati kayo, sajay ngoreshan i intenengan jo, ey mesepol la ense-mek tayoy kait tayoy.

¹² Aliwén tayoy koma onoran sota inpasing nen Kain nonta bayag da ja ngaaw. Si-kato, wára son Satanas; ngaaw ngoreshan i aramid to. Isonga binono tos agi ton si Abel, tep si Abel, mapteng i ogadi to.

¹³ Isonga si-kayon kait ko, karekayo messhaaw nem en-oges shakejo ni karakdan na tood ja dobong, ja enshiy Shiyos sha.

¹⁴ Nem si-katejo, ensemblek tayoy kait tayod pamati, jet sotan i tayoka penigorado-i ey angken metey kito, wára ngoreshan i biyag tayoy alin enshiy to engintegan. Nem sota enshiy semek to so ni kait to, ka-onong ja emantoshong shi patey ingkatod ingka.

¹⁵ Sota enshiy semek to ni kait to, maybidang ey mabono. Jet amta tayoy ey say toon mabono, enshi son si-kato i biyag ga enshiy to engintegan ja edapo son Apo Shiyos.

¹⁶ Jet say amta-an tayoy so ni podnon semek, sajay. Si Cristo, intolok toy bakdang ton metey

shi koros say ikaro toy basol tayo; isonga kasta met koma son si-katejo, sajay i mesepol la onoran tayo. Itolok tayo koma ngoy biyag tayo ni pansigshan ni kait tayo.

¹⁷ No kaspangarigan ey wáray toon kostoy biyag to, tan wára ngoy toon ebiteg, jet saja sakey ya toon kostoy biyag to, amta to ey sajay ya ebiteg, maligdigat, ita et mangon ikowan to ey wáray semek to son Apo Shiyos ket eg to met kaasi-an i kait to?

¹⁸ Si-kayon naka ikarin annak ko, say semek tayo koma shi kait tayo, aliwén sota notnotnot ono esel bengat ja emedepod bongot, no diket mesepol la podnon semek ja wáray maykaasi shi eshom.

No ensemek tayo i kait tayo, wára ngoy shinel tayo ja mengshew son Apo Shiyos ni tolong

¹⁹ No wáray semek tayo so ni eshom, sotan i amta-an tayo so ey wára kito son Apo Shiyos ja kedepo-i ni podno, jet enshi may shanag tayo no ewáten shakito nen Apo Shiyos ono enshi.

²⁰ Jet angken bilang ey dekna-en tayo nem sina-shom ey ngaaw kiton too, eg kito koma meshanagan. Wara kito ngoreshan son Apo Shiyos. Engatngato ngoreshan si Apo Shiyos jet amta ton emin i wáred poso tayo, no mapteng ono ngaaw.

²¹ Nem no bilang ey enshiy dag-en tayon ngaaw, enshiy dekna-en tayon embalaw shorog ni bakdang tayo, isonga mapmapteng pay, ta eg kito onbaing son Apo Shiyos.

²² Jet no mengshaw kito son si-kato ni angken nganto, i-akan toy kekshawen tayo, ta tayoka pati-a i bilin to, tan tayoka dag-a i piyan to.

²³ Jet say bilin nen Apo Shiyos, kowan to ey mesepol la pati-en tayo i ngaran nonta Anak ton si Jesucristo, tan mesepol la ensemek tayoy kait tayo. Jet angken si Cristo, sajay met laeng i inbilin to son si-katejo.

²⁴ Sota ira ememati ni bilin nen Apo Shiyos, si-karay wára son Apo Shiyos, jet si Apo Shiyos, wára ngo son si-kara. Say amta-an tayo so ey si Apo Shiyos ket wára ni olay son si-katejo, wára sota Ispirito Santo to ja nan-iyán son si-katejo ja edapo son si-kato.

4

Iyay i pengilesinan jo ni podno tan o-owap

¹ Si-kayon kait kod pamati ja ensemek ko, karejo iba-ngat ja pati-en i kompormin too ja ikowan to ey sota Ispirito Santo nen Apo Shiyos i kedepo-i ni toka itoro. No diket ashal jo nin no agpayson edapo son Apo Shiyos, tep eshakil iray ma-o-owap ja kowan sha ey si Apo Shiyos i engibetkag son si-karen mengitosho. Jet si-karay naywáris shi emin na dogad.

² Nem sajay i amta-an jo so no agpayson wára sota Ispirito Santo nen Apo Shiyos son si-kara ono ayshi: sota ira mengitosho ey si Jesus, si-kato sota inbetkag ali nen Apo Shiyos, ja nay-anak ja too, si-karay podnoy toro sha, ja wáray Ispirito Santo nen Apo Shiyos son si-kara.

³ Nem sota ira aliwén sajay i shaka itoro, enshiy Ispirito Santo nen Apo Shiyos son si-kara, no diket si-kara sota kawad-an ni ispiriton makakontra son Cristo. Intenengan jon wára di sota makakontra son Cristo, jet niman wára ira ma ja naywáris shiya dobong.

⁴ Nem si-kayon naka ikarin annak ko, wáres Apo Shiyos son si-kayo, isonga inebak jo ira jay; eg kayo na-awis. Ta si Apo Shiyos ja wára son si-kayo, makedkedsang nem say si Satanas ja wára so nonta ira karakdan shiya dobong ja eg emati.

⁵ Saja o-owap i toro sha, nay-eshom ira shima wáred ja dobong ja makakontra son Apo Shiyos. Isonga sota toro sha ngo, inges to sota nem-nem nonta nay-eshoman sha. Jet sota karakdan shiya dobong, pipiyan shen itenengan sota kaikokowan ngo ira nonta o-owap i toro sha.

⁶ Nem si-kami i shinotokan nen Apo Shiyos ja mengitosho ni podno, jet sota ira maka-amta ngo son Apo Shiyos, shaka pati-a iya kowan mi. Nem sota ira eg memati son Apo Shiyos, endedamsis sha iyay. Isonga sajay day pengilesinan tayo no sipay kawad-an ni Ispirito Santo nen Apo Shiyos ja podnoy toro to, tan no sipay o-owap i wára son si-kato.

Si Apo Shiyos, inpa-sas toy semek to son si-katejo jet sesmeken tayo ngoy kait tayo

⁷ Si-kayon ensemble ko, mesepol la waray semek tayo ni olay so ni kait tayo. Ta say edapo-an ni semek, si Apo Shiyos. Isonga sota

ensemek toy kait to, si-karay podnon maka-amta son Apo Shiyos jet si-karay annak to.

⁸ Sota enshiy semek to ni kait to, eg to amta si Apo Shiyos, ta si Apo Shiyos, poro semek i wára son si-kato.

⁹ Say amta-an tayo so ey ebadeg i semek nen Apo Shiyos son si-katejo, sajay. Inbetkag to ali sota sesakey ya Anak to shiya dobong, say mewad-an kito nonta biyag ja enshiy to engintegan, pangkep nonta inkatey tod koros.

¹⁰ Owen, say itsora nonta mapteng nga semek ka kowan ko la son si-kayo, aliwén inges to sota semek tayo son Apo Shiyos, no diket sajay sota ebadeg ga semek nen Apo Shiyos son si-katejo, jet say ka-amta-an to, inbetkag to ali sota Anak to shiya dobong ja etey shi koros, say ma-omas i basol tayo.

¹¹ Si-kayon ensemek ko, nemnem jo sota inpasing nen Apo Shiyos ni semek to son si-katejo; isonga mesepol ngon onoran tayo ja sesmeken tayo i kait tayo.

¹² Enshi pay nin i toon engasas son Apo Shiyos, nem no ensemek tayo i sakey tan sakey son si-katejo, si Apo Shiyos, wára ngo son si-katejo. Jet mebedin na singa asen ni eshom i itsora nen Apo Shiyos, ta sota semek tayo, waray nay-ingesan to shi semek to.

¹³ Say kabol la tayoka penigorado-i ey wára kito son Apo Shiyos, tan wára ngo si Apo Shiyos son si-katejo, sota inpan-iyen ni Ispirito Santo to son si-katejo.

¹⁴ Isonga amta tayo ey sota Anak nen Apo Shiyos ja inbetkag to di, si-katoy mengisedakan

ni emin na tood ja dobong. Inon-an min mismo jet si-katoy mika ikokowan so ni totoo.

¹⁵ Jet no sipay toon ememati ey si Jesus ket Anak nen Apo Shiyos, si-karay kawad-an nen Apo Shiyos, tan wára ngo ira son si-kato.

¹⁶ Jet sajay i inamta-an tayo so ey si Apo Shiyos, ebadeg ngoreshan i semek to son si-katejo, jet pinati tayo ma.

Si Apo Shiyos, poro semek i wára son si-kato, isonga sota toon wára ni olay i semek to ni kait to, wára son Apo Shiyos, tan si Apo Shiyos, wára ngo son si-kato.

¹⁷ Isonga sota semek ja inamta-an tayo, si-kato sota semek ja enshiy kolang to. Jet angken onsabi ali sota akew ja pengigsheng nen Apo Shiyos no sipay maysedakan, waray shinel tayo, enshiy tayo panshanagan, ta angken niman shiya dobong, waray semek tayo so ni kait tayo ja inges tos Cristo.

¹⁸ No waray semek tayo so ni kait tayo, enshiy takot tayo. Ta sota shinel son Apo Shiyos ja wára son si-katejo no ensemek tayoy kait tayo, si-katoy kaondingding ni takot. Sota waray takot to, kolang i semek to, ta say kabol la ewara-an ni takot to, waray basol ton ikaro to.

¹⁹ Si Apo Shiyos i epangdon waray semek to son si-katejo, isonga wára ngoy semek tayo.

²⁰ No kaspangarigan ey waray toon mengikowan ey ensemek tos Apo Shiyos, nem en-oges to kariy kait to, sajay ya too, ma-o-owap. Ta kas-ano karin waray semek to son Apo Shiyos ket eg to inon-an? Nem sota kait ton toka as-asa ni olay ket, en-oges to!

²¹ Nemnem jo sota bilin nen Cristo son si-katejo, ja kowan to ey, “No sipay toon waray semek to son Apo Shiyos, mesepol ngon ensemblek toy kait to.”

5

¹ Sota ira ememati ey si Jesus, si-kato sota inbetkag ali nen Apo Shiyos shiya dobong, si-karay podnon annak nen Apo Shiyos, jet sota ira waray semek to son Apo Shiyos ja Maka-anak son si-kara, wara ngoy semek sha so nonta kait shen annak to.

² Say amta-an tayo so ey ensemblek tayoy kait tayon annak nen Apo Shiyos, no tayoka pati-a i bilin to.

³ Say ka-asan ni semek tayo son Apo Shiyos, sota pemati tayo ni bilin to. Jet sajay ya bilin to, aliwen edigat ta mepati,

⁴ ta si-katejon annak nen Apo Shiyos, si Apo Shiyos i ontolong son si-katejo tep waray pamati tayo son Cristo. Isonga eg kito ontolok ja ma-ebak ja mandeka ni ngaaw ja inges toy kedagdag-a ni karakdan na tood ja dobong.

⁵ Enshiy eshom ma makabaal ja mengebak ni olay nem eg ira sota ememati ey si Jesus, si-kato sota Anak nen Apo Shiyos.

Sota kabol ni kepenigorado-i ni emati son Cristo

⁶ Sajay ya si Jesucristo, dimaw ali shiya dobong, jet nonta indaw to ali, ebonjagan ni shanom, tan imayos i shaletto ni inkatey tod koros. Eg maykowan ey shanom bengat i takshol to ni indaw to di, no diket naytakshol pay son si-kato

sota shala. Jet sota Ispirito Santo nen Apo Shiyos i emengikowan ey podno iyay, ta sotan na Ispirito Santo, podnon emin i wára son si-kato.

⁷⁻⁸ Isonga wáray tedo ja sesakey i kowan sha pangkep son Cristo, jet sajay ira sota tedo: sota Ispirito Santo nen Apo Shiyos, sota shanom, tan sota shala, jet saja tedo, nan-i-inges i kowan sha.

⁹ No tayoka pati-a i kowan ni too pangkep ni inon-an sha, mas epatpateg pay i kowan nen Apo Shiyos, jet say inkowan to maypangkep son Jesus, kowan to ey, “Si-katoy Anak ko.”

¹⁰ Jet sota ememati so nonta Anak nen Apo Shiyos, sajay ngoy shaka nemnemnema; nem sota ira eg memati, enshi, eg sha nemnemen. Ta eg sha pinati sota kowan nen Apo Shiyos maypangkep so nonta Anak to. Jet singa si Apo Shiyos et ngo mowan i kowan sha ey ma-owap.

¹¹ Jet sotan na kowan nen Apo Shiyos, ja mesepol la pati-en, kowan to ey wáray in-akan ton biyag son si-katejo ja enshiy to engintegan, jet sajay ya biyag, may-ekan bengat so nonta ira memati son Jesus ja Anak to.

¹² Isonga sota ira memati son si-kato, wára son si-kara iyay ya biyag, nem sota ira eg memati son Jesus ja Anak nen Apo Shiyos, enshi son si-kara iyay ya biyag ja enshiy to engintegan.

Sota esa-nopan ni inkowan ko la

¹³ Insolat ko la iyay son si-kayo ja emati so ni ngaran nen Jesus ja Anak nen Apo Shiyos, say penigorado-an jo ey si-kayo, wáray biyag jon enshi to engintegan.

¹⁴ Asan sakey pay ja piyan kon penigorado-an jo, sota maypangkep ni panshewat jo son Apo Shiyos. Ta no manshewat kito son Apo Shiyos, sintilen to, no maykompas nodta piyan ton medeka.

¹⁵ Siya, toka sintila i shawat tayo; isonga sota ibaga tayo son si-kato, amta tayo ey i-akan to.

¹⁶⁻¹⁷ Emin na ngaaw wa aramid ja dag-en ni too, maybidang ey basol. Nem eg nan-i-inges i pengikesho ni basol. Iman i eshom ma basol ja aliwen patey ingkatod ingka i pantongpalan to. Nem wara ngoy eshom ma basol ja patey i pantongpalan to. Isonga no waray inon-an jon nanbasol ja agi jod pamati, ikshawi jo son Apo Shiyos ni kaasi, no sotan na basol to ket, aliwen patey i pantongpalan to. No sotan i dag-en jo, si Apo Shiyos, biyagen to sotan na agi jo. Nem sota eshom ma basol, ja patey i pantongpalan to, aliwen sotan i kowan ko ey ishawatan jo son Apo Shiyos.

¹⁸ Amta tayo ey si-katejon annak nen Apo Shiyos, inbi-jag tayon manbesol ma, ta si Jesu-cristo ja Anak nen Apo Shiyos, si-katoy emengitoshong son si-katejo shi mapteng. Jet si Satanas, enshiy pesing ton onsharal son si-katejo.

¹⁹ Amta tayo pay ey wara kito son Apo Shiyos, nem saja intiron dobong ja naydaokan tayo, tinnigel nen Satanas.

²⁰ Jet amta tayo pay ey sota Anak nen Apo Shiyos, dimaw ali shiya dobong jet engi-kan son si-katejo ni koston pannemnem say ewatan tayo i maypangkep son Apo Shiyos, ey si-kato i podno. Jet say kawad-an tayo ma niman, sota podnon

Shiyos, tan si Jesucristo ja Anak to. Sajay i podnon Shiyos, ja emengi-kan ni biyag ja enshiy to engintegan.

²¹ Niman si-kayon naka ikarin annak ko, tan-shaaniyo; baka wára iray aliwén podnon Shiyos ja pati-en jo. Siya, satan da.

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c